

光緒吉林通志

吉林通志卷一百二

人物志三十一

國朝十六

國恩泰

子那敏

圖魯石

子舒書

圖那

弟沙慕賽

鄂申

索渾

瓜喇

子庫達禪

額塞

胡爾班

博奇

屯泰

布色赫

伊吉禮

噶布喇

薩克察

圖爾伯深

塔爾機善

蘇巴泰

翁什庫

旦代

哈爾漢

查蘇喀

羅多禮
子諾穆齊
羅多禮

傅察

猶子疏拜

吳達納

猶子胡什屯

喀喀齊

弟鄂赫武納
哈

阿爾泰

從弟艾穆布

納璘

子達爾呼達

和碩退

猶子雍貴

達喇密

闊緒

察瑪垓

猶子羅思漢
鹽玉

布庫

子察哈達
都達海

布當奇理

湯古善

達爾漢

穆福

發爾那

邦納密

章泰

子賈爾海

薩魯 族子吳鈕

邁思哈

瓦星阿 吳興格 阿布 糾多 子鄂多和 勒德

哈爾哈濟 剛阿達 訥爾德

國恩泰姓納喇氏世居輝發後隸滿洲正藍旗通漢

文書籍天聰八年應禮部試

賜舉人崇德元年入直內秘書院順治元年授禮部理事官

八年提侍郎尋陟尙書並居禮部十三年

世祖以六官多溺職各予降黜於是亦降三級留任十五年

罷康熙八年起工部尙書調禮部十年致仕十二年

卒

賜祭葬如例子那敏康熙十八年任三等侍衛尋授佐領雍正二年遷正白旗滿洲副都統既擢鑲黃旗滿洲都統十二年卒子諾岷歷官山西巡撫史載其兩疏言事非官資僅具者比例不得詳也

圖魯石姓納喇氏世居葉赫隸滿洲鑲黃旗崇德間任理藩院副理事官順治元年隨英親王阿濟格擊流賊連敗之三年隨豫親王多鐸討叛酋騰機思道擊喀爾喀碩羅汗土謝圖汗等兵並捷五年齎

詔往蒙古值鄂爾多斯賈木蘇之亂爲所害

卹贈雲騎尉世職子舒書襲九年兩遇

恩詔晉世職騎都尉兼一雲騎尉十一年隨青海大將軍伊

爾德征浙江舟山連戰皆捷多所斬獲晉世職輕車
都尉康熙元年隨定西將軍愛星阿由雲南入緬甸
十三年逆藩吳三桂反從征至四川擊賊廣元縣勝
之明年從征陝西逆鎮王輔臣轉戰漢中府等處敗
賊者六晉世職二等

圖那姓托科羅氏世居虎爾哈天命六年我兵征其
地父卓爾糾來歸授佐領隸滿洲正白旗天聰三年
從征明燕京偕鄂羅塞臣督運芻草遇敵兵力戰陣
沒

卽贈騎都尉世職次子沙慕賽襲圖那其長子也初以戰功授佐領坐事黜崇德六年從征明圍錦州偕鄂莫克圖擊其松山騎兵連戰皆捷又擊敗經略洪承疇步兵三營英親王阿濟格駐兵杏山河岸敵兵自甯遠來窺同前鋒統領努山逆擊於連山斬三十級獲馬如之尋偕鄂莫克圖往視甯遠濠塹敗其騎兵沙河敵騎五十來窺我牧所率兵往拒其兵四百人繼至與戰大敗去八年隨貝勒阿巴泰征明遇明總兵以眾拒戰偕色赫擊斬之順治元年隨豫親王多鐸南征追流賊至潼關三戰皆捷賊乘夜來犯我營復同

雅賴敗之於濠邊明年與布當奇理雅賴等攻克揚州府城旋隨貝勒博洛趨杭州偕鄂碩費揚古敗明大學士馬士英兵於城外移攻松江府先登克之積功復佐領授騎都尉世職七年九年三遇

恩詔晉世職二等輕車都尉十六年從征廣西遇明將李定國力戰沒於陳子尼耶和襲沙慕賽旣襲父騎都尉世職順治七年九年三遇

恩詔晉二等輕車都尉十一年從征明魯王至浙江舟山隨甯海大將軍伊爾德擊其英毅伯阮思等戰艦百餘敗之以功晉世職一等

鄂申姓鈕祜祿氏世居英額隸滿洲正紅旗父巴賚
國初偕其族屬來歸

太祖以爲侍衛令仍所居會鄰屯構兵

命率族攻其南

太祖親攻其北屯長以眾降廢壬子葉赫烏喇哈達等九部
犯境從大軍禦之力戰有功天命三年築城界藩以
爲長駐之明年明總兵劉綎等率兵來犯敗去五年
自

與京邊都薩爾湖築城以扎客丹爲界仍

命爲長駐之明年從攻北平先登拔其城及戰遼陽創甚

恩資獨優尋統兵駐守英額煮鹽於虎爾哈輪廣甯衛儲之
又率兵攻瓦爾喀俘獲甚眾復被

優資八年

特賜人戶十天聰六年年老致仕崇德八年卒年七十八鄂
申崇德五年從征明圍錦州克松山七年隨貝勒阿
巴泰征明至山東拔臨清州順治元年隨睿親王多
爾袞入山海關破流賊李自成追至保定大殲之尋
隨都統葉臣徇下直隸諸郡縣進征山西又隨英親
王阿濟格勦陝西流寇並有功三年隨貝勒博洛定
浙閩明年隨將軍哈哈木擊陝西賊帥王雲祥分兵

攻白水縣及蒲城並先登克之

賜號巴圖魯積功授騎都尉世職十年從征廣東破潮州明年隨甯海大將軍伊爾德征舟山數敗明總制陳六御等兼一雲騎尉康熙元年任杭州協領八年擢京口副都統十三年逆藩耿精忠叛偕諸將討之自浙入閩大小十數戰獲僞總兵閻標陳深參將林英以下官二百餘員誅之斬級萬數千奪軍資無算事平追坐賊陷江山縣不能禦及不能奪台州之小梁山海州之祖山頭以功抵仍罷任三十二年卒年七十五索渾姓瓜爾佳氏世居烏喇隸滿洲鑲白旗初任護

軍參領崇德五年隨睿親王多爾袞征明錦州偕副都統席特庫陳斬敵兵二十獲馬六十四明年從圍錦州城中兵出犯率所部力擊敗之七年

太宗親征錦州與諸將戰松山杏山及遇明經略洪承疇兵並捷都斬級四百有奇獲馬幾三百奪糧六旣而松山騎兵乘夜突出與諸將追至海岸多所斬馘還遇杏山騎兵復同席特庫等擊斬百數十級有降明蒙古兵十六人據山巔瞭我偕胡禮布徒步往殲之八年隨鄭親王濟爾哈朗征明甯遠凡三戰復隨貝勒阿巴泰征明三河凡四戰皆勝斬獲甚夥順治元年

隨睿親王入山海關流賊李自成將唐通拒於一片石同席特庫力戰敗之偕都統譚泰追擊又勝積功授騎都尉世職兼一雲騎尉七年九年三遇

恩詔晉世職一等輕車都尉累官至護軍統領兼吏部侍郎十六年擢本旗滿洲都統康熙元年坐同內大臣達素征福建無功褫職

瓜喇姓民覺羅氏世居鄂莫渾隸滿洲正黃旗崇德六年以佐領從圍明錦州擊敗松山援兵於濠邊經略洪承疇率兵犯我鑲紅旗營同巴布海援擊卻去尋復三犯我步軍營並敗之及敵兵潰入塔山五里

臺睿親王多爾袞令率護軍守之俄而援至逆擊卻
去斬級十數獲馬十明日攻破其臺盡殲焉無一人
得逸復擊破監軍道張春兵及巡視海岸我達布孫
尼堪僅千人敵眾適至或欲進以眾寡不敵止之俟
夜戰久之鼓而前無不以一當十敵多溺水死進軍
昌平州我以雲梯登者率被創退乃越眾蹂攀而上
卒克之從攻大同復有功七年隨都統譚泰等征明
至黃崖口攻克其城順治元年隨譚泰征山西駐防
太原援破圍陽曲縣賊二千俄都統宜拜營復圍於
賊偕阿濟拜以四百騎夜往解之賊敗遁獲馬四百

有奇三年隨肅親王豪格征四川擊流賊張獻忠兵
數破之自從征討身被二十七創被

賚者十次積功授騎都尉世職七年九年三遇

恩詔晉世職二等輕車都尉累官副都統以疾卒子某襲又
子庫達禪康熙十三年以護軍參領從征逆藩吳三
桂戰石門坎黃草壩有功授騎都尉世職二十九年
隨裕親王福全征噶爾丹戰烏闌布通陳沒

卹贈兼一雲騎尉

額塞姓納喇氏世居葉赫隸滿洲鑲白旗崇德三年
從征明夜以雲梯襲攻吳橋縣偕偏珠先登拔之授

雲騎尉世職六年從圍明錦州敗敵於松山順治二年隨豫親王多鐸南征至淮安擊敵黃淮之間旣捷又連敗之三里橋海安湖口橋師進如皋縣偕副都統康喀爾擊敗敵兵五千餘副將高某以騎兵三千駐鶯台山島偕參領格爾圖往擊潰去尋從征福建有功五年從討江西叛鎮金聲桓連敗賊兵賊渠王得仁率步騎七千犯我鎮黃旗營同署參領阿玉璽擊卻之積功兼七年九年三遇

恩詔晉世職二等輕車都尉十年從征湖廣戰沒於衡州

卹晉世職一等子滿塞襲

胡爾班姓汪佳氏世居訥圖隸滿洲正白旗崇德八年從攻明霸州偕噶尼先登拔之

賜號巴圖魯授騎都尉世職順治元年隨都統葉臣征山西取太原府斬流賊偽總兵一副將三明年隨英親王阿濟格征流賊至陝西延安府賊夜出犯偕胡世納賈隆阿擊走之我佐領哈爾漢鄂本陷賊同鄂穆索科入賊陳覓之者再賊不能禦卒得其尸以還城賊奔偕馬習以四十人躡擊連戰皆捷尋敗賊綏德州追至湖廣武昌府遇賊眾擊之復再勝三年從征福建三戰敵三北五年隨征南大將軍譚泰討江西叛

鎮金聲桓賊將郝善以兵萬餘來拒偕諸將擊敗之
師次南昌府焚賊船七百獲船十賊眾犯我鎮黃旗
濠塹援擊敗去六年賊以步騎二萬寇贛州營於徐
嶺偕諸將進破其五營叛鎮李成棟之遁復邀擊敗
之積功兼七年九年三遇

恩詔晉世職二等輕車都尉十一年隨靖南將軍珠瑪喇征
廣東連敗明將李定國兵於新會縣戰甚力以功晉
世職一等兼一雲騎尉尋卒子卓泰襲卓泰卒子卓
山襲以戰功累晉二等男爵故事巴圖魯多攻城先
登者得之謂之勇號天聰崇德間大將而下其偏裨

隸吉林

賜號可詳者胡爾班外曰博奇曰屯泰曰布色赫曰伊吉禮
曰噶布喇曰薩克察曰圖爾伯深曰塔爾機善曰蘇
巴泰曰翁什庫大抵皆是物也書曰我則有熊羆之
士詩曰矯矯虎臣其諸人之謂乎

博奇姓舒書覺羅氏世居長白山之伊爾海隸滿洲
鑲藍旗崇德三年隨睿親王多爾袞征明至山東攻
濟南府偕蘇巴泰等先登克之

賜號巴圖魯授騎都尉世職六年從攻松山明兵乘夜出奔
追敗之以功兼一雲騎尉順治元年隨豫親王多鐸

追勦流賊於潼關三戰三捷明年南攻泗州及揚州
下之其夏追明福王至蕪湖敗其將黃得功獲船五
三年隨豫親王追討叛酋騰機思擊土謝圖汗兵大
破之積功晉世職輕車都尉七年遇

恩詔晉二等尋卒

屯泰姓馬佳氏世居薩哈既移於綏芬隸滿洲正黃
旗天聰五年從大兵取明大淩河留駐錦州近郊敵
兵來犯身爲軍鋒陷其陳崇德八年隨貝勒阿巴泰
征明至山東以雲梯攻費縣先登克之

賜號巴圖魯並前功授騎都尉世職順治七年遇

恩詔兼一雲騎尉

布色赫姓奇氏世居葉赫隸滿洲正紅旗崇德三年
隨貝勒岳託征明攻深州僭達雅禮以雲梯先登克
其城

賜號巴圖魯授騎都尉世職順治元年隨睿親王多爾袞入
山海關擊流賊李自成敗之尋隨都統葉臣征山西
至太原府敗土賊千餘又偕阿爾賽擊敗偽總兵兼
一雲騎尉七年九年三遇

恩詔晉世職一等輕車都尉

伊吉禮姓馬佳氏世居薩哈既移於綏芬隸滿洲正

黃旗崇德三年隨貝勒岳託征明越燕京攻趙州先登克之

賜號巴圖魯授騎都尉世職兼一雲騎尉順治三年卒兄子博磊襲遇

恩詔晉世職輕車都尉

噶布喇姓瓜爾佳氏世居松阿里隸滿洲正白旗崇德三年隨睿親王多爾袞征明至山東攻樂安縣先登克其城

賜號巴圖魯授騎都尉世職順治元年隨睿親王入山海關以功兼一雲騎尉弟嘉龍阿初以從征黑龍江功授

雲騎尉世職順治二年從擊延安府流賊不利身爲軍殿被十二創沒於陳

卹晉世職輕車都尉優於常科云

薩克察姓西他拉氏世居長白山之尼牙滿村隸滿洲正白旗崇德八年隨貝勒阿巴泰征明至山東攻壽光縣先登克其城

賜號巴圖魯授騎都尉世職順治元年隨睿親王多爾袞破流賊於山海關偕諸將追擊又連敗之以功兼一雲騎尉七年九年三遇

恩詔晉世職一等輕車都尉

圖爾伯深姓布爾察氏世居阿庫里隸滿洲正黃旗
崇德八年隨貝勒阿巴泰征明至山東圍攻泗水縣
先登克之

賜號巴圖魯授騎都尉世職順治七年九年三遇

恩詔晉世職二等輕車都尉累官杭州將軍致仕卒

賜祭葬如故事諡敏果

塔爾機善姓西克特立氏世居瓜爾察之洪鄂村隸
滿洲鑲紅旗崇德八年隨貝勒阿巴泰征明攻順德
府偕羅多洪以雲梯先登克之

賜號巴圖魯授騎都尉世職兼一雲騎尉順治七年九年三

遇

恩詔晉世職一等輕車都尉

蘇巴泰姓瓜爾佳氏世居烏蘇隸滿洲正黃旗崇德三年從征明至山東攻濟南府先登克其城

賜號巴圖魯授騎都尉世職兼一雲騎尉六年從大兵征明圍錦州數有戰功晉世職二等順治七年九年三遇恩詔晉一等輕車都尉兼一雲騎尉

翁什庫姓甯古塔氏世居綏芬隸滿洲正黃旗崇德四年從征黑龍江戰哈嚴屯有功八年隨貝勒阿巴泰征明至山東攻滕縣先登克之

賜號巴圖魯授騎都尉世職順治七年九年三遇

恩詔晉世職二等輕車都尉

旦代姓伊喇立氏世居葉赫隸滿洲鑲黃旗崇德元年任前鋒參領以所部從取安水城授雲騎尉世職四年偕巴圖魯鼇拜略地錦州斬級二十獲馬十四羊七十明年從征明以功晉世職騎都尉兼一雲騎尉七年從圍明錦州擊明經略洪承疇兵陳沒

卹贈一等輕車都尉世職同旗哈爾漢姓佟佳氏世居佳哈崇德六年從圍明錦州松山騎兵來劫我紅衣礮偕護軍參領丹代擊敗之順治元年隨睿親王多爾袞

入山海關破流賊李自成明年同葉克舒追擊流賊至延安府以甲士四十守南山有賊步騎來犯偕敖賓力戰不退被創卒

卹贈騎都尉世職敖賓隸正白旗他未詳

查蘇喀姓吳蘇氏世居甯古塔隸滿洲正藍旗有文學崇德初以佐領直文館

賜號巴克什七年從攻明錦州戰裏紅山陳沒故事宜有

卹贈失之矣羅多禮姓瓜爾佳氏世居葉赫隸滿洲鑲藍旗崇德八年任理藩院員外郎考滿授雲騎尉世職順治七年奉

命招甘肅白帽賊爲所留不屈死之子三吳實襲世職累官
都統巴錫累官雲貴總督內遷戶部侍郎諾穆齊則
仲子也康熙十四年以署參領從征逆藩吳三桂沒
於陳

卹贈雲騎尉世職

傅察姓鈕祜祿氏世居烏喇隸滿洲正黃旗崇德三
年隨貝勒杜度征明至山東攻滕縣以雲梯先登入
之後無繼者遂戰沒

卹贈騎都尉世職無子兄子疏拜襲順治七年九年三遇

恩詔晉世職輕車都尉康熙十四年從征叛鎮王輔臣擊僞

總兵高定蔡遠於關山河敗之進圍秦州平涼賊萬餘來援城賊亦出連戰皆勝又解羅門鎮之圍尋敗僞總兵張興等於北山十六年隨征南將軍穆占禦逆藩吳三桂於湖廣十八年擊賊松滋縣敗之積功晉世職一等

吳達納姓鈕汪堅氏世居輝發隸滿洲鑲藍旗崇德三年以前鋒參領隨睿親王多爾袞征明攻寶坻縣先登克之六年隨鄭親王濟爾哈朗圍明錦州夜克其外城八年隨貝勒阿巴泰征明擊敗其總兵白廣恩進攻薊州身先士卒力戰殞焉

卹贈騎都尉世職無子猶子胡什屯初以戰功授雲騎尉至是兼襲順治初任荊州協領流寇攻陷應城縣隨駐防將軍往援三戰皆勝陳斬偽副將二守備三把總一兵二百餘遂復其城晉世職輕車都尉

喀喀齊姓瓜爾佳氏世居烏喇隸滿洲鑲黃旗崇德七年以軍校隨貝勒阿巴泰征明明年至山東攻東阿縣自水洞潛入克其城投雲騎尉世職順治七年九年三遇

恩詔晉世職輕車都尉尋卒弟卹赫襲十一年隨甯海大將軍伊爾德征浙江舟山偕署護軍統領尼雅達數敗

明魯王將英毅伯阮思等獲其戰艦以功晉世職二等
等有武納哈者與同旗姓赫舍里氏世居葉赫亦以
功授騎都尉世職累官江甯副都統

阿爾泰姓阿穆拉氏世居長白山之渥集隸滿洲鑲
黃旗崇德八年以軍校隨貝勒阿巴泰征明至山東
攻沂水縣我軍有滾泰者以雲梯先登阿爾泰繼之
克其城授雲騎尉世職尋卒子觀音保襲順治七年
遇

恩詔晉世職騎都尉未幾卒無子以從弟艾穆布襲十一年
征浙江舟山隨署護軍統領尼雅達擊敗明將阮思

又敗其總制陳六御等以功兼一雲騎尉順治十七年從征福建隨平南將軍賚塔連擊敗鄭成功將劉國軒等十九年復隨征逆孽吳世璠進自廣西破賊兵於石門坎進奪黃草壩直逼雲南城城平積功晉世職二等輕車都尉

納璘姓塔他拉氏世居瓦爾喀初投朝鮮爲部屬崇德元年朝鮮平來歸授世管佐領隸滿洲正黃旗順治元年從入山海關破流賊李自成又追敗之望都以功授雲騎尉世職卒子敏達襲七年九年三遇

恩詔晉一等輕車都尉坐事降騎都尉兼一雲騎尉改以其

弟達爾呼達襲十一年從征廣東連敗明將李定國
兵於新會縣有功晉世職輕車都尉

和碩退姓瓜爾佳氏世居蘇完隸滿洲正黃旗崇德
三年從大兵征明攻甯津縣先登克其城授雲騎尉
世職八年從征明攻順德府城復先登克之晉世職
騎都尉順治七年九年三遇

恩詔晉輕車都尉尋以從征福建功晉世職二等病卒無子
兄子雍貴襲十六年隨安南將軍達素征福建率舟
師敗鄭成功兵於烏龍江上旋聞羅源縣被圍率師
往援力戰沒於陳

卹贈晉世職一等

達喇密姓瓜爾佳氏世居蘇完隸滿洲正黃旗崇德三年隨貝勒岳託征明敵兵夜犯前鋒營偕諾木齊逆擊敗之師至博野縣先登克其城以功授雲騎尉世職順治元年從入山海關擊流賊李自成敗之晉世職騎都尉七年九年三遇

恩詔累晉二等輕車都尉

闕褚姓瓜爾佳氏世居三姓隸滿洲正黃旗崇德四年從征黑龍江力戰被創九仍破敵兵以功授騎都尉世職順治七年九年三遇

恩詔晉世職二等輕車都尉卒子賽弼圖襲數從征伐身受
數創康熙四十七年坐事降騎都尉尋以創發卒
卹贈兼一雲騎尉子長安襲

察瑪琰世居完顏以地爲氏隸滿洲正黃旗崇德間
任前鋒侍衛從征戰有功授雲騎尉世職卒兄子羅
思漢襲順治七年九年三遇

恩詔晉騎都尉康熙元年以前鋒參領隨定西將軍愛星阿
征雲南連敗明將李定國兵晉世職二等輕車都尉
躋玉與同旗姓薩克達氏世居甯古塔崇德四年以
驍騎校隨薩穆什喀等征黑龍江有功授世管佐領

卒孫曰張保住從征逆藩吳三桂戰沒於烏木山

卹贈雲騎尉世職傳天聰崇德間人例不及孫以國殤著之
布庫姓民覺羅氏世居佛訥赫隸滿洲正白旗父胡
密色事

太祖時有賈海虎色者遣滾布魯持鳩藥來獻訶知之飛馬
馳奏謀乃不行天聰八年追論其功授長子莫爾泰
世管佐領以老休致布庫繼之崇德三年隨貝勒岳
託証明越燕京攻任邱縣偕宜爾彌隨蓀掘頽其城
垣克之授騎都尉世職兼一雲騎尉順治七年遇

恩詔晉世職輕車都尉卒次子察哈達襲順治十一年隨靖

南將軍珠瑪喇征明桂王至廣東擊其將李定國兵於新會縣連敗之以功晉世職二等初布庫之卒長子穆臣病故察哈達以次子襲至是穆臣病愈以父世職讓之而已得戰功所授雲騎尉云同旗都達海姓托和洛氏世居烏喇崇德三年以軍校隨貝勒杜度征明至山東攻濟陽縣克之順治元年隨豫親王多鐸追擊流賊李自成於潼關敗之明年隨貝勒博洛征浙江有功三年復隨豫親王追叛酋騰機思破喀爾喀土謝圖汗及碩雷汗兵授雲騎尉世職卒布當奇理姓納喇氏世居葉赫隸滿洲正白旗崇德

三年以前鋒參領隨貝勒杜度征明旣出邊率甲士
二十人爲殿明兵來追擊卻之五年從圍明錦州敗
杏山騎兵明年復從圍錦州敗松山步兵並爲軍鋒
八年隨貝勒阿巴泰征明至三河縣擊敵步騎於渾
河岸敗之順治元年十一月隨豫親王多鐸追流賊
李自成於潼關連戰皆捷又擊敗賊兵夜劫我營者
攻關先登克之明年師至揚州府偕諸將用紅衣礮
破其城積功授騎都尉世職

湯古善姓覺羅氏世居烏喇隸滿洲正白旗崇德六
年大兵征明圍錦州隨副都統星訥擊松山騎兵敗

之任工部理事官順治元年從入山海關偕參領烏庫禮督步騎擊走流賊李自成以功授騎都尉世職五年考滿兼一雲騎尉七年九年三遇

恩詔晉世職一等輕車都尉烏喇有達爾漢姓納喇氏與同旗崇德七年以雲騎尉從征明圍松山敵兵犯我鑲紅旗營偕特晉擊敗之順治元年從入山海關擊走流賊李自成以功晉騎都尉世職七年九年三遇恩詔晉二等輕車都尉

穆福姓佟佳氏世居烏喇隸滿洲正白旗崇德八年署前鋒參領隨鄭親王濟爾哈朗攻明前屯衛分兵

趨中前所偵知城中人已遁遂入據之順治元年隨睿親王多爾袞入山海關擊走流賊李自成追至望都及真定府又連敗之尋隨都統葉臣征山西至河南懷慶府有賊拒戰偕都統巴哈納擊敗其眾逐北至黃河岸既抵太原周視其城城內賊突出力戰乃遁旋率前鋒兵偵賊絳州渡口遇賊步騎千餘擊走之獲其船六明年隨英親王阿濟格征陝西自西安府躡賊至湖廣承天府道殲數百人獲船十有二賊自承天遁率前鋒兵追敗之破其一營仍擊敗賊將積功授騎都尉世職五年隨征南大將軍譚泰討江

西叛鎮金聲桓四戰皆勝所獲賊船及燒燬者甚夥
偕和托招降南豐縣以功兼遇七年九年

恩詔晉世職二等輕車都尉

發爾那姓吉朗吉瓦爾喀氏世居長白山隸滿洲正
白旗數以軍校從征伐順治元年隨豫親王多鐸平
江南尋隨貝勒博洛征浙江敗敵富陽縣進趨杭州
破明大學士馬士英等兵至嘉興府偕敦兌擊敗城
內出戰者敵水陸兩路來援復偕顏納代連戰大破
之四年從征福建進自分水關以前鋒敗敵於峽口
同鄂碩敦兌攻關入之破其兵萬餘五年隨征南大

將軍譚泰討江西叛鎮金聲桓擊敗賊兵二千於童子渡進攻饒州府同噶爾他拉吳孫畢朗敗賊城下復偕顧魯穆奇力戰拔其城賊兵數來犯同前鋒統領博爾惠擊敗之積功兼七年九年三遇

恩詔授騎都尉世職兼一雲騎尉十五年從征明桂王於貴州明年師還至江南鄭成功陷鎮江瓜州進逼江甯隨副都統噶褚哈擊之江中奪船二遂會江甯諸軍與連戰成功敗遁以功晉世職輕車都尉

邦納密姓塔塔兒氏世居瓦爾喀父馬福塔

與姓納喇氏者

同崇德元年率百餘戶來歸隸滿洲正紅旗用戰功

賜號巴圖魯並蟒袍貂帽各一五年授世管佐領卒邦納密
繼其職數從征討順治元年隨睿親王多爾袞入山
海關偕前鋒參領鈕尼哈擊敗流賊李自成又偕和
碩額駙杜雷追至望都大破之尋隨豫親王多鐸追
討流賊至潼關攻所據山寨連敗賊兵以功授騎都
尉世職三年隨豫親王討逆酋騰機思率所部破賊
有功兼七年九年三遇

恩詔晉世職二等輕車都尉十八年隨定西將軍愛星阿征
雲南入緬甸以功兼一雲騎尉康熙十四年坐事削
恩詔所得世職餘輕車都尉以其兄尙祿襲

章泰姓納喇氏世居松阿里隸滿洲鑲白旗崇德三年隨貝勒岳託征明至獻縣以雲梯先登被創不退卒克其城授雲騎尉世職順治二年創發卒子賈爾海襲七年九年三遇

恩詔晉世職輕車都尉十年隨貝勒吞齊征湖南遇孫可望兵於岔路口率所部敗之明年隨青海大將軍伊爾德征浙江舟山擊明英毅伯阮思等連敗其眾以功晉世職二等十六年追論章泰功復晉世職一等薩魯姓吳蘇氏世居訥殷父戴蒙安率宗族及鄉人來歸時

太祖初編佐領以其眾令轄之隸滿洲鑲白旗尋卒薩魯繼其職崇德七年從圍明錦州擊敗松山騎兵進擊經略洪承疇三營兵復連敗之師還又擊卻敵兵來追者順治元年隨睿親王多爾袞入山海關破流賊李自成追敗之望都授騎都尉世職三年偕諸將追擊流賊連敗賀珍等於商州進攻西平縣先登克之以功兼七年九年三遇

恩詔晉世職一等輕車都尉族子曰吳鈕以軍校從征雲貴敗明將李成蛟又隨征南將軍卓布泰擊李定國於雙河口四戰皆勝復追擊於魯岡連敗之授雲騎尉

世職

邁思哈姓趙佳氏世居瑚布察隸滿洲鑲白旗崇德八年隨貝勒阿巴泰征明至山東攻齊東縣先登克之授雲騎尉順治七年九年三遇

恩詔晉世職騎都尉兼一雲騎尉尋卒子覺和托襲康熙十三年隨貝勒董額征陝西叛鎮王輔臣至丁華嶺賊將率眾來拒力擊敗之進圍秦州賊兵自四川平涼來援城內賊出應之拒擊並敗去又數敗輔臣子王繼正等以功晉世職輕車都尉

瓦星阿姓富察氏世居訥殷隸滿洲鑲白旗崇德八

年隨貝勒阿巴泰征明至山東攻諸城縣繼賈爾布以雲梯登城克之授雲騎尉世職順治元年隨豫親王多鐸南追流賊戰於潼關巴圖魯鼎格身先陷陳瓦星阿怒馬越出其前賊潰明年移師江南攻常熟縣紅衣礮擊埒城垣奮身先登積功晉騎都尉世職七年九年三遇

恩詔晉世職二等輕車都尉十八年卒同旗曰吳興格曰阿布代吳興格姓伊爾根覺羅氏世居長白山崇德八年亦隨阿巴泰征明攻甯海州以雲梯繼祁塔特登城克之授雲騎尉世職順治七年九年三遇

恩詔晉世職輕車都尉十三年卒阿布代姓瓜爾佳氏世居
烏喇崇德八年隨阿巴泰征明攻昌邑縣繼達爾布
以雲梯登城克之授雲騎尉世職順治七年遇

恩詔晉世職騎都尉卒無子兄阿布賴襲九年兩遇

恩詔晉世職輕車都尉十一年隨宵海大將軍伊爾德征浙
江舟山有功晉世職二等

糾多姓魯布里氏世居烏喇隸滿洲鑲紅旗崇德間
以功游任前鋒參領順治元年隨睿親王多爾袞入
山海關破流賊李自成明年隨豫親王多鐸平淮安
有新昌王據易州偕海塔擊敗其眾三年隨肅親王

豪格征四川敗賊於雞頭關又擊張獻忠敗之爲礮所傷遂病發七年授雲騎尉世職九年再遇

恩詔晉世職騎都尉兼一雲騎尉十三年卒子鄂多和襲十五年隨副都統噶褚哈征貴州十六年凱旋至江南會鄭成功陷鎮江瓜州進犯江甯偕大軍擊之有功晉世職輕車都尉同旗勒德姓納喇氏世居依巴丹崇德八年從征明至山東攻臨清州下之授騎都尉世職順治七年九年三遇

恩詔晉世職輕車都尉坐事後降爲雲騎尉

哈爾哈濟姓瓜爾佳氏世居烏喇隸滿洲鎮藍旗初

任王府二等侍衛崇德五年遷前鋒參領隨睿親王
多爾袞征明圍錦州敵兵夜犯貝子羅託營偕眾往
援大敗之授雲騎尉世職順治七年九年三遇

恩詔晉世職輕車都尉孫希思哈以功累官都統授雲騎尉
世職剛阿達姓譚木查氏隸滿洲正藍旗亦居烏喇
崇德三年隨貝勒杜度征明至廣平府攻臨洺關先
登拔之授雲騎尉世職順治七年遇

恩詔晉世職騎都尉卒子宋鈕襲九年兩遇

恩詔晉世職輕車都尉

訥爾德姓科特氏世居葉赫隸蒙古正藍旗崇德六

年以佐領隨大兵圍明錦州率所部連敗敵兵八年
隨貝勒阿巴泰征明過燕京遇敵步騎五百於安肅
縣以所部敗之敵據三河立營要我去路偕諸將進
擊乃遁順治元年隨豫親王多鐸追討流賊至潼關
三戰皆捷尋隨貝勒博洛征浙江戰杭州嘉興再敗
敵眾授雲騎尉世職七年遇

恩詔晉世職騎都尉

吉林通志卷一百三

人物志三十二

國朝十七

賀布索

穆成格

海度

尼雅翰

納考

偏俄

布爾思海

科諾闊

羅察

布爾賽

安崇阿

屯達爾漢
哈泰沙哈納

瓦古禮

覺和拓

諾莫渾

索博多

巴蘭庫
鄂黑瑪

滿丕

巴錫

倪堪

干泰

薩音達禮

尙吉圖

阿哈里

翁愛劉佳

禪聘

福格

席喇巴

哈爾

顏珠虎

額僧特巴

都爾

胡里

郭和齊

鍾內

多克隊
伊騰

囊武

賈哈喇

穆善等

賀布索姓納喇氏世居葉赫隸滿洲鑲紅旗父和託

與姓瓜爾佳氏董鄂氏
及同氏居輝發者同名

崇德三年從征明再敗敵兵

進攻深州及博平縣並先登克之明年從平黑龍江

積功授騎都尉世職任兵部理事官五年六年再從

圖明錦州七年從征甯遠順治元年從入關並有功

兼考滿累晉世職一等輕車都尉七年遇

恩詔兼一雲騎尉卒賀布索襲九年兩遇

恩詔晉至二等男爵任參領洊擢副都統康熙三年隨靖西將軍穆里瑪定西將軍圖海征流賊李來亨於湖廣賊據茅麓山率所部攻之戰甚力無何他賊自山後猝至殞焉

賜祭葬如例

卹贈晉男爵一等兼一雲騎尉族人穆成格隸滿洲正黃旗順治十五年隨信郡王多尼征明桂王戰荊州有功明年凱旋至江甯會鄭成功陷鎮江瓜州來犯隨副都統噶褚哈與江甯官兵禦之有功予雲騎尉世職海度姓舒書覺羅氏世居長白山隸滿洲鑲白旗順

治初任佐領十五年從征貴州凱旋會鄭成功陷鎮
江瓜州徑圍江甯自長江下援同江南兵擊敗之康
熙十三年從征逆藩耿精忠敗僞副將馬思等兵二
千於浙江臨善村僞將軍馬九玉率眾五萬營九溪
遷木山遣僞總兵桑明等以步騎二萬來犯隨大軍
逆擊敗去尋連與賊戰皆勝九玉親率賊眾渡江來
犯復隨大軍擊之北原口村九玉敗走又擊賊小門
山鎮峰山太平山等處所至輒捷明年師進福建鄭
成功將軍吳淑陳泉州江岸與戰敗之又敗賊兵二
千於半山成功將劉國軒等以眾萬餘攻海澄往援

戰沒

卹贈騎都尉世職兼一雲騎尉子常生襲

尼雅漢姓富察氏世居訥殷隸滿洲鑲白旗初任前鋒參領順治七年九年三遇

恩詔授騎都尉世職十一年隨靖南將軍珠瑪喇往廣東敗明桂王將李定國兵於新會縣追至橫州江岸復敗之以功兼一雲騎尉擢內務府總管授散秩大臣康熙十年擢都統尋加太子少保十八年卒官同旗有納考者同氏世居扎庫塔博爾屯亦以隨靖南將軍珠瑪喇征廣東有功予雲騎尉世職

偏俄姓伊爾根覺羅氏世居葉赫隸滿洲鑲黃旗初
任佐領管牧圍事順治二年以同政克舉授騎都尉
世職七年九年三遇

恩詔晉世職二等輕車都尉十一年復以督牧勤勞晉世職
爲二等男爵累官內大臣加太子太傅

布爾思海姓赫舍里氏世居葉赫隸滿洲正紅旗父
拜音達禮於

國初任佐領順治元年布爾思海隨睿親王多爾袞入
山海關破流賊李自成以功予雲騎尉世職七年九
年三遇

恩詔晉世職輕車都尉累官副都統遷兵部侍郎同旗科諾
闊姓覺察氏世居烏蘇里順治初從征陝西攻甘州
先登克其城

賜號巴圖魯授騎都尉世職七年九年三遇

恩詔晉世職輕車都尉

羅察姓佟佳氏世居嘉哈隸滿洲鑲白旗初任刑部
副理事官順治四年考滿予雲騎尉世職明年從征
湖廣擊流賊一隻虎於荊州敗之尋駐防江甯土賊
陷無爲州同俄屯往攻所部先登克其城晉世職騎
都尉七年遇

恩詔所得世職准世襲罔替九年兩遇

恩詔晉世職輕車都尉同旗布爾賽姓富察氏世居扎庫塔

初任佐領順治九年兩遇

恩詔授騎都尉世職十一年隨貝勒屯齊征湖南擊流賊餘
黨孫可望兵於岔路口敗之十六年從征貴州凱旋
至江南會鄭成功陷鎮江瓜州犯江甯隨副都統噶
褚哈合江甯官兵擊敗之于雲騎尉世職

安崇阿姓瓜爾佳氏世居訥殷隸滿洲鑲黃旗順治
初隨貝勒博洛征福建攻汀州府先登克之

賜號巴圖魯授騎都尉世職七年九年三遇

恩詔晉世職輕車都尉黃海其長子也歷官副都統上駟院
大臣同旗曰屯達爾漢曰阿哈泰並葉赫人屯達爾
漢姓喀爾喇氏順治二年以軍校駐防江甯十一年
從征浙江舟山隨護軍統領乘船擊敵躍登其舟因
敗之于雲騎尉世職阿哈泰姓伊喇里氏順治五年
從征江西叛鎮金聲桓十五年從征貴州凱旋至江
南擊鄭成功圍江甯之眾並有功予雲騎尉世職卒
子保山襲以戰功晉世職騎都尉又沙哈納姓吳爾
古禪氏世居穆倫亦同旗順治十五年以署前鋒校
從征貴州敗明桂王將李成蛟及李定國兵予雲騎

尉世職康熙三年從征湖廣流寇李來亨於茅麓山
亦有功

瓦古禮姓富察氏世居扎庫塔博爾屯隸滿洲鑲白
旗順治元年隨睿親王多爾袞入山海關擊敗流賊
李自成子雲騎尉世職七年九年三遇

恩詔晉世職騎都尉同旗拉薩禮姓格濟勒氏世居和通吉
初任佐領順治元年亦隨睿親王入關擊敗流賊夏
隨都統覺羅巴哈納等征山西敗賊太原府進征陝
西破賊延安府予雲騎尉世職卒子博壽襲七年九
年三遇

恩詔晉世職騎都尉

覺和拓姓鈕胡魯氏世居扎庫穆隸滿洲正白旗順治三年以軍校從征湖廣擊流賊敗之五年從征江西叛鎮金聲桓隨都統富拉塔守江上賊自南昌以舟運糧過率護軍乘小船擊奪其舟九十聲桓率賊萬餘來戰隨護軍統領博和哩擊走之進攻九江府先登克其城授騎都尉世職七年九年三遇

恩詔晉世職輕車都尉

諸莫渾姓伊圖馬氏世居葉赫之科爾沁隸滿洲鑲黃旗順治間從征山東土賊賊結寨以拒攻之未能

破眾退復偕一人進攻眾隨之遂克康熙十六年隨前鋒統領哈克山征逆藩吳三桂至湖廣擊賊永興縣哈克山戰沒馳入賊陳奪其尸以出旣出復入殺賊過當賊羣趨之亦沒於陳

卹贈雲騎尉世職子卓爾博圖襲

索博多姓富察氏世居東海之愛滿隸滿洲正白旗父色木忒赫於

國初來歸授佐領卒索博多襲管其事順治初數從征伐以功予雲騎尉世職七年九年三遇

恩詔晉世職騎都尉尋隨將軍巴三征江南戰崑山擒敵將

一調駐瓜州十六年鄭成功統眾來犯力戰沒於陳
卹贈兼一雲騎尉巴蘭亦姓富察氏世居蘇完隸滿洲正白
旗順治十六年以前鋒校從征福建乘戰艦攻廈門
力戰殞焉

卹贈雲騎尉世職同時戰沒者有鄂黑瑪庫姓瓜爾佳氏世
居烏喇隨安南將軍內大臣達索至福建戰廈門尤
力

卹贈雲騎尉世職所隸未詳

滿丕姓覺羅氏世居葉赫隸滿洲正黃旗初任佐領
順治六年隨異親王滿達海討山西叛鎮姜瓖至太

原府賊將以兵二萬圍沁源縣偕羅碩瓜喇援擊敗之十七年從征福建鄭成功自統兵十餘萬犯洪義壩率所部與大軍合擊成功走師進海澄中礮殞

卹贈雲騎尉世職從弟吳納純襲同旗巴錫姓富察氏世居訥殷父阿爾納任工部員外郎順治間以造宮殿成予雲騎尉世職尋卒巴錫襲康熙十五年從征逆藩吳三桂至江西明年與賊將韓大任等戰吉安府驛子山被創旋沒

卹贈雲騎尉世職子佟保襲

倪堪姓張佳氏世居瓜爾察隸滿洲正白旗初以雲

騎尉世職任參領順治十二年從征貴州與明魯王
將李定國戰魯噶被創旋沒

賞銀七百兩先是有千泰者姓瓜爾佳氏世居虎爾哈與同
旗順治二年隨前鋒統領鼐拜追流賊先登被重創
明年隨平南大將軍勒克德渾征湖廣降荊州流賊
千餘五年隨英親王阿濟格討山東土賊戰曹縣殞
焉

卽贈雲騎尉世職

薩音達禮姓額陀氏世居長白山隸滿洲正紅旗順
治十七年以佐領從征俄羅斯敵以舟師據烏喇崖

偕佐領馬喇往擊被圍手殺十數人沒於陳

卹贈雲騎尉世職子席錦泰襲同旗尙吉圖姓納喇氏世居
尼馬察順治十五年從征雲南同大軍擊明將李成
蛟於涼水井敗之又擊李定國於魯噶敗其眾萬餘
尋偕護軍參領查令阿與戰復勝十八年從征山東
土寇賊夜劫我營倉卒戰沒

卹贈雲騎尉世職弟沙欣襲

阿哈里姓索綽羅氏世居烏喇隸滿洲鑲白旗順治
十八年以軍校從征山東土賊其渠段秉珮以五百
餘人據山立寨仰擊敗之進至大寨嚴賊眾千餘逆

戰復敗去鋸齒牙山巖險甚往視巖後遇賊四百進
擊勝之康熙十五年從征陝西至顯義關敗僞總兵
高定蔡元進圍秦州復敗其城內出拒者賊黨自四
川來援城賊與合力戰沒於陳

卹贈雲騎尉世職子阿爾賽襲同旗翁愛姓吳爾達氏亦居
烏喇順治十五年以軍校從征雲貴兩敗明魯王將
李定國軍康熙三年從征流寇李來亨於湖廣茅麓
山連戰皆勝其黨自宜都縣來援復敗之進戰彝陵
陳沒

卹贈雲騎尉世職子卓色襲又軍校劉住姓富察氏世居蜚

悠城亦同旗順治十六年從征福建鄭成功列戰艦
六百餘艘於浦澄舉以拒隨大軍擊敗之轉戰至廈
門沒於陳

卹贈雲騎尉世職弟春拜襲

禪聘姓瓜爾佳氏世居烏喇隸滿洲正藍旗順治十
七年以署護軍校隨定西將軍愛星阿平雲南入緬
甸護明桂王康熙十三年從征逆藩吳三桂至江西
連敗僞左總兵等於袁州及四都十五年僞將軍夏
國相李良棟等據萍鄉縣東來龍山掘濠立寨隨安
親王岳樂攻破之又敗僞總兵陳夏劉心求等於平

江縣十七年隨貝子章泰進湖廣擊敗僞將軍吳國貴於武岡州二十年三路大軍會雲南平逆孽吳世璠與有功累授騎都尉世職

福格姓鈕祜祿氏卽所居地也隸滿洲正藍旗順治五年姜瓖反大同所在多陷以軍校從攻汾州府破之予雲騎尉世職七年九年三遇

恩詔晉世職騎都尉兼一雲騎尉累官副都統同旗席喇巴姓顏扎氏世居法庫順治十五年以佐領從征貴州凱旋會鄭成功陷鎮江瓜州進攻江甯列舟江上隨副都統噶褚哈擊敗之尋合江甯官軍與連戰皆勝

予雲騎尉世職卒子七十三襲哈爾泰姓納喇氏世居輝發亦同旗順治十六年從征雲南攻克沅江府城有功賞銀五十兩康熙十四年從征逆藩吳三桂先後得功牌三十六又從征巴顏布喇昭莫多等處予雲騎尉世職歷官護軍參領

顏珠虎姓納喇氏世居葉赫隸滿洲正黃旗順治十五年以軍校從征雲南明桂王將李定國結寨以拒隨大軍破之所射殪甚多又戰涼水井雙河口魯噶等處皆勝予雲騎尉世職康熙十三年從征逆藩吳三桂戰彝陵被創進岳州及宜都縣連敗賊兵二十

一年創發卒子滿泰襲同旗額僧特姓瓜爾佳氏世居輝發順治間數從征討以功予雲騎尉世職旋亦創發卒子張構襲又都爾巴姓完顏氏卽所居地父英格於

國初來歸授世管佐領順治間卒都爾巴嗣管其事以戰功累授二等輕車都尉世職亦同旗也

胡里姓他塔拉氏世居扎庫穆隸滿洲鑲白旗初任佐領順治十五年隨信郡王多尼征貴州破明桂王將李成蛟於涼水井進渡瀘江至雲南磨盤山李定國設重兵以待隨前鋒統領白爾赫圖等力擊敗之

又追敗之魯岡康熙十四年從征逆藩耿精忠至江西與僞都督范超明戰艾口顏子明戰南康皆勝十六年移師廣東隨鎮南將軍莽依圖擊逆藩吳三桂僞將軍馬寶於韶敗之又敗僞總兵姜熊於樹梓墟進攻廣西僞將軍吳世琮以步騎迎戰敗去又於陶屯敗僞將軍范齊韓兵二十年隨征南大將軍賚塔進平雲南積功授騎都尉世職

郭和齊姓舒穆魯氏世居烏拉隸滿洲正白旗順治十五年隨信郡王多尼征明桂王於貴州敗其將李成蛟於涼水井又敗李定國兵於雙河口磨盤山等

處予雲騎尉世職

鍾內姓文都氏世居訥殷隸滿洲鑲白旗父郎格於國初來歸任佐領卒鍾內嗣管其事順治十五年隨信郡王多尼征明桂王於貴州戰十萬崎山破其總兵羅大順凱旋至江甯值鄭成功陷鎮江瓜州來犯隨副都統噶褚哈會江甯官兵擊敗之積功授騎都尉世職康熙十三年卒從孫那爾泰襲同旗多克隊囊武岱並烏喇人多克隊姓克勒德氏順治十五年以軍校隨甯南靖寇大將軍宗室羅託征明桂王於貴州師次靖州其總兵田國欽黃世貴約降阻於其黨

不果隨前鋒統領鄂內往迎之擊敗其黨二千餘進至雲南連敗其將李成蛟李定國兵於涼水井雙河口子雲騎尉世職囊武岱姓索綽羅氏順治六年隨鄭親王濟爾哈朗征湖廣破流賊於衡州直抵全州十五年從征貴州凱旋至江南會鄭成功陷鎮江瓜州犯江甯隨副都統噶褚哈合江甯官兵擊敗之子雲騎尉世職又伊騰者姓燕濟氏世居葉赫亦同旗順治十一年以軍校隨青海大將軍伊爾德征浙江舟山有功十五年隨信郡王多尼征雲南圍沅江府敵眾千餘來犯我蘆岡逆擊之卻走旣又連破其眾

子雲騎尉世職

賈哈喇姓富察氏世居訥殷隸滿洲鑲黃旗初任副
佐領順治十五年從征明桂王於貴州軍次靖州其
總兵田國欽黃世貴等請降爲其黨所阻隨前鋒統
領鄂內率兵擊潰阻者遂受其降明年凱旋至江南
適鄭成功陷鎮江瓜州犯江甯隨副都統噶褚哈會
江甯官兵擊敗之于雲騎尉世職康熙八年卒子桑
格襲以戰功晉世職騎都尉同旗穆善姓納喇氏世
居烏喇順治十七年以侍衛隨定西將軍愛星阿平
雲南入緬甸獲明桂王康熙十四年從征陝西叛鎮

王輔臣逆藩吳三桂僞將軍王屏藩以三萬眾營漢
中西長寨尋渡江躡我後隨大軍擊敗之追敗之漢
中西猴子嶺擊僞將軍劉慶成又勝師入四川僞將
軍譚洪率步騎來犯時爲軍鋒力擊卻去至尙陽關
隨大軍轉戰鍾家營益門鎮等處五接皆勝予雲騎
尉世職而曰色赫曰杜喇隸滿洲鑲白旗並以戰功
兼遇

恩詔授一等輕車都尉世職滿洲正黃旗胡錫布與同旗杭
舒亦以戰功遇

恩詔授輕車都尉世職又參領薩哈連佐領雅賴及吳爾佳

齊亦同旗以戰功授騎都尉世職佐領秦達祐以戰功兼遇

恩詔授騎都尉世職兼一雲騎尉則隸滿洲鑲黃旗同旗鄂內以戰功授一等騎都尉世職慕成格亦以功授騎都尉世職並官參領星額禮以戰功兼遇

恩詔授騎都尉世職而滿洲正紅旗佐領阿哈贈正藍旗佐領巴爾柱及鑲紅旗白亨特並以戰功遇

恩詔授騎都尉世職其以功予雲騎尉世職者正黃旗則佐領銜艾褚正白旗則依里布及蘇通阿鑲黃旗則日孟俄岱日塔納爾岱鑲白旗則佐領生保及占代與

齊爾布正藍旗則曰阿布善曰溫達禮曰闊納曰伊
拉奇鑲紅旗則準布祿鑲藍旗則曰胡西納曰胡佳
曰布祿曰常隆曰英福並隸滿洲而與色赫以下皆
籍吉林者也又籍吉林隸陳滿洲者正藍旗則花翎
記名副都統協領格魯德爾鑲藍旗則花翎佐領尼
新泰並以戰功授騎都尉世職而尼新泰兼一雲騎
尉云